

Na osnovu člana IV 4. a) Ustava Bosne i Hercegovine, Parlamentarna skupština Bosne i Hercegovine, na 27. sjednici Predstavničkog doma, održanoj 10. aprila 2008. godine, i na 16. sjednici Doma naroda, održanoj 16. aprila 2008. godine, usvojila je

ZAKON

O IZMJENAMA I DOPUNAMA IZBORNOG ZAKONA BOSNE I HERCEGOVINE

POGLAVLJE 1. OSNOVNE ODREDBE

Član 1.

U Izbornom zakonu Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06 i 32/07) u članu 1.1a. u stavu (1) iza tačke 7) dodaju se nove tačke 8), 9), 10) i 11), koje glase:

"8) "Pripadnik nacionalne manjine" je državljanin BiH koji ne pripada nijednom od tri konstitutivna naroda. Nacionalnu manjinu čine ljudi istog ili sličnog etničkog porijekla, iste ili slične tradicije, običaja, vjerovanja, jezika, kulture i duhovnosti i bliske ili srodne historije i drugih obilježja.

9) "Raseljeno lice" je državljanin BiH kojem je status raseljenog lica utvrdio nadležni organ uprave za pitanja raseljenih lica u skladu sa zakonom.

10) "Izbjegli lice" podrazumijeva državljanina BiH koji ima biračko pravo i boravi u inozemstvu sa statusom izbjeglog lica iz BiH.

11) "Parlamentarna stranka" podrazumijeva političku stranku koja je zastupljena u predstavničkim ili zakonodavnim organima vlasti."

Član 2.

U članu 1.2a. dodaje se novi stav (6), koji glasi:

"(6) Sredstva za provođenje izbora, institucije iz stava (1), (2), (3) i (4) ovog člana moraju obezbijediti u roku od 15 dana od dana donošenja odluke Centralne izborne komisije BiH o raspisivanju izbora."

Član 3.

U članu 1.3 iza riječi "osnovu" dodaju se riječi: "slobodnih izbora," i riječi: "neposrednim i" zamjenjuju se riječima: "direktno od birača".

Član 4.

U članu 1.3a. u stavu (2) riječi: "konstituiranja predstavničkog tijela" zamjenjuju se riječima: "objavljivanja rezultata izbora u Službenom glasniku BiH".

Iza stava (2) dodaje se novi stav (3), koji glasi:

"(3) Izabrani nosilac mandata izabran na neposrednim i posrednim izborima dužan je da potpiše izjavu kojom odbija ili prihvata mandat na obrascu koji propisuje Centralna izborna komisija BiH."

Član 5.

U članu 1.5 stav (2) mijenja se i glasi:

"Državljanin BiH koji privremeno živi u inozemstvu i ima biračko pravo, ima pravo da glasa lično (dolaskom na odgovarajuće biračko mjesto u BiH ili u diplomatsko-konzularnom predstavništvu BiH u inozemstvu) ili poštom (slanjem glasačkog listića poštom) za općinu u kojoj je imao prebivalište prije odlaska u inozemstvo, ako u toj općini ima prijavljeno prebivalište u trenutku podnošenja prijave za glasanje van zemlje."

Dodaju se novi st. (3), (4) i (5), koji glase:

"(3) Centralna izborna komisija BiH će posebnim propisom, u skladu s ovim Zakonom, regulirati kompletan postupak glasanja u diplomatsko-konzularnom predstavništvu BiH (postupak i rokove prijavljivanja za glasanje, imenovanje biračkih odbora, utvrđivanje broja i rasporeda biračkih mjesta i postupak provođenja izbora).

(4) Centralna izborna komisija BiH utvrdit će broj i raspored biračkih mjesta u diplomatsko-konzularnim predstavništvima BiH prema kriterijima iz člana 5.2 ovog Zakona.

(5) Centralna izborna komisija BiH imenovat će biračke odbore za glasanje u diplomatsko-konzularnim predstavništvima BiH tako da se u svakom biračkom odboru osigura zastupljenost članova iz svakog konstitutivnog naroda."

Član 6.

U članu 1.8 u stavu (1) iza riječi: "ljudska prava" dodaje se riječ "notari".

Član 7.

U članu 1.10 u stavu (1) tačka 1. mijenja se i glasi:

"1. danom podnošenja ostavke;"

U istom članu i stavu iza tačke 1. dodaje se nova tačka 2. koja glasi:

"2. ako je opozvan u skladu sa zakonom;"

Dosadašnje tačke 2., 3., 4., 5., 6. i 7. postaju tačke 3., 4., 5., 6., 7. i 8.

U istom članu i stavu tačke 2., 3. i 4., koje su ovim izmjenama postale tačke 3., 4. i 5., mijenjaju se i glase:

"3. danom smrti;

4. danom pravosnažnosti sudske presude kojom je osuđen na kaznu zatvora u trajanju od šest mjeseci ili duže;

5. danom pravosnažnosti sudske odluke kojom je lišen poslovne sposobnosti (proglašen mentalno nesposobnim);"

U istom članu i stavu u tački 5. koja je ovim izmjenama postala tačka 6. riječi: "ako bude" zamjenjuju se riječima: "danom kada je".

U istom članu u stavu (2) druga rečenica: "Nadležni organ utvrđuje prestanak mandata u roku koji ne može biti duži od 15 dana od dana nastupanja razloga prestanka mandata, odnosno saznanja razloga prestanka mandata" mijenja se i glasi:

"Centralna izborna komisija BiH donosi odluku o prestanku mandata izabranom članu organa vlasti u roku koji ne može biti duži od 15 dana od dana kada su nastupili razlozi za prestanak mandata, odnosno od saznanja o razlogu za prestanak mandata i o tome obavještava organ vlasti u kojem je izabrani član imao mandat."

U istom članu u stavu (2) treća rečenica: "Ako član podnese ostavku, dužan je da je podnese na obrascu koji utvrdi Centralna izborna komisija BiH." postaje stav (3).

POGLAVLJE 2. ORGANI ZA PROVOĐENJE IZBORA

Član 8.

U članu 2.2 riječi: "članovi izbornih komisija i biračkih odbora" zamjenjuju se riječima: "član izborne komisije i biračkog odbora" u odgovarajućem padežu, a riječi: "su lica" zamjenjuju se riječima: "je lice".

U istom članu u stavu (3) riječi: "prethodnog stava" zamjenjuju se riječima: "iz stava (2) ovog člana".

U istom članu dodaje se novi stav (4), koji glasi:

"(4) U sastavu općinske izborne komisije i biračkog odbora nastojat će se osigurati da broj članova manje zastupljenog spola bude najmanje 1/3 od ukupnog broja članova."

Dosadašnji stav (4) postaje stav (5).

U istom članu iza stava (4), koji je ovim izmjenama postao stav (5), dodaje se novi stav (6), koji glasi:

"(6) Ukoliko član izborne komisije i biračkog odbora u toku mandata ne prisustvuje obuci iz stava (4) ovog člana, bit će razriješen dužnosti."

Član 9.

U članu 2.4 riječi: "članovi", "imenuju", "pet", zamjenjuju se riječima: "član", "imenuje" i "sedam", u odgovarajućem padežu, a riječi: "i mogu biti imenovani u istu izbornu komisiju najviše dva puta uzastopno" brišu se.

Član 10.

U članu 2.5 u stavu (3) iza riječi: "Administrativna komisija" riječi: "Predstavničkog doma" brišu se i iza riječi "Komisije" dodaju se riječi: "iz Predstavničkog doma Parlamentarne skupštine Bosne i Hercegovine".

U istom članu u stavu (5) riječi: "u punom sastavu" i "Prema odredbama ovog Zakona" brišu se i riječi: "oglašavanja i imenovanja" zamjenjuju se riječima: "oglašavanja i utvrđivanja prijedloga kandidata".

Član 11.

U članu 2.9 stav (1) u tački 4a. iza riječi "spolu" dodaju se riječi: "starosti, razvrstani po izbornim jedinicama".

U istom članu i stavu u tački 9. ispred riječi "potvrđuje" dodaju se riječi: "utvrđuje i".

U istom članu i stavu tačka 14. mijenja se i glasi:

"14. donosi odluku o prestanku mandata izabranog zvaničnika na svim nivoima neposrednih i posrednih izbora u Bosni i Hercegovini obuhvaćenih ovim Zakonom, a vodi i prethodni postupak, gdje je potrebno, o utvrđivanju činjeničnog stanja (u slučaju kada je izabrani zvaničnik podnio ostavku, da je to učinio svojom voljom);"

U istom članu i stavu iza tačke 14. dodaje se nova tačka 15., koja glasi:

"15. provjerava odluku nadležnog organa o prestanku mandata izabranog zvaničnika opozivom, kako bi se osiguralo da je mandat izabranog zvaničnika prestao u skladu s ovim Zakonom;"

Dosadašnje tačke 15. i 16. postaju tačke 16. i 17.

Član 12.

U članu 2.12 u stavu (1) riječi: "od tri ili pet članova" zamjenjuju se riječima: "od tri, pet ili sedam članova" i dodaje se nova rečenica koja glasi:

"Općinska izborna komisija može imati sekretara općinske izborne komisije za obavljanje administrativno-tehničkih poslova."

U istom članu u stavu (5) riječi: "i razrješava" brišu se, iza riječi: "komisije BiH" dodaju se riječi: ", na osnovu javnog oglasa po proceduri koju utvrđuje Centralna izborna komisija BiH posebnim propisom".

U istom članu dodaju se novi st. (6) i (7), koji glase:

"(6) Članove općinske izborne komisije razrješava općinsko vijeće, odnosno skupština općine, uz saglasnost Centralne izborne komisije BiH.

(7) Član općinske izborne komisije ne može biti zastupnik odnosno punomoćnik političkog subjekta koji učestvuje na izborima, niti lice koje je pravosnažnom sudsdom presudom osuđeno na kaznu zatvora u trajanju od šest mjeseci ili duže."

Dosadašnji st. (6) i (7) postaju st. (8) i (9).

Član 13.

U članu 2.13 stav (1) tačka 1. briše se.

Dosadašnje tačke 2., 3., 4., 5., 6., 7., 8., 9. i 10. postaju tačke 1., 2., 3., 4., 5., 6., 7., 8. i 9.

Član 14.

U članu 2.14 u stavu (2) riječi: "sedam (7)" zamjenjuju se brojem "15" i riječi: "prethodnog stava" zamjenjuju se riječima: "stava (1) ovog člana".

POGLAVLJE 3. BIRAČKI SPISAK

Član 15.

U članu 3.1 u stavu (4) iza riječi: "učešće na izborima" dodaju se riječi: "i kojima je ovjerena kandidatska lista za učešće na izborima".

Član 16.

Član 3.5 mijenja se i glasi:

"Centralni birački spisak vodi se po službenoj dužnosti.

Centralna izborna komisija BiH vodi Centralni birački spisak za teritoriju Bosne i Hercegovine na osnovu evidencije nadležnog državnog organa koji vodi registar građana Bosne i Hercegovine u skladu sa Zakonom o centralnoj evidenciji i razmjeni podataka, osim ako ovim Zakonom nije drugačije određeno.

Nadležni državni organ iz stava (2) ovog člana održava i odgovoran je za cjelokupnu tehničku obradu svih podataka značajnih za evidenciju Centralnog biračkog spiska (u daljnjem tekstu: organ koji tehnički održava evidenciju Centralnog biračkog spiska).

Nadležnom organu koji vodi evidencije o državljanima BiH u skladu s odredbama Zakona o jedinstvenom matičnom broju, Zakona o prebivalištu i boravištu državljana BiH i Zakona o ličnoj karti državljana BiH podatke dostavljaju:

- a) nadležni matični ured o smrti građana starijih od 18 godina i
- b) nadležno ministarstvo Bosne i Hercegovine o ispisu iz državljanstva BiH.

Organu koji tehnički održava evidenciju Centralnog biračkog spiska podatke u skladu sa Zakonom o centralnoj evidenciji i razmjeni podataka kao i odredbama Zakona o jedinstvenom matičnom broju, Zakona o prebivalištu i boravištu državljana BiH i Zakona o ličnoj karti državljana BiH dostavlja nadležni organ koji vodi evidencije o promjenama prebivališta i boravišta.

Organu koji tehnički održava evidenciju Centralnog biračkog spiska podatke dostavljaju:

- a) općinske izborne komisije o biračkim mjestima i
- b) Centralna izborna komisija BiH i općinske izborne komisije o promjenama biračke opcije.

Za tačnost i ažurnost podataka potrebnih za izradu Centralnog biračkog spiska odgovoran je organ nadležan za vođenje službenih evidencija o tim podacima.

Nadležni matični uredi dužni su da nadležnom organu koji vodi službene evidencije o jedinstvenom matičnom broju, prebivalištu i boravištu državljana BiH dostavi sve promjene koje utiču na ažurnost Centralnog biračkog spiska u pisanoj formi najkasnije u roku od sedam dana od dana kada je promjena nastala.

Nadležni organi koji vode službene evidencije o jedinstvenom matičnom broju, prebivalištu i boravištu državljana BiH odgovorni su za ažurnost i ispravnost navedene evidencije, te su dužni da čuvaju dosijee dokumenata, javnih isprava i zahtjeva građana na osnovu kojih se vodi i ažurira Centralni birački spisak i da na zahtjev Centralne izborne komisije BiH osiguraju pristup i uvid u ove dokumente."

Član 17.

U članu 3.10 u stavu (1) iza tačke h) dodaju se nove tačke i) i j), koje glase:

"i) biračko mjesto

j) datum prijave prebivališta ili boravišta"

Dosadašnja tačka i) postaje tačka k).

U istom članu u stavu (3) riječ "izgled" zamjenjuje se riječju "sadržaj".

Član 18.

Iza člana 3.12 dodaje se novi član 3.12a, koji glasi:

"Član 3.12a.

Birač koji promijeni prebivalište u periodu od 45 dana prije održavanja izbora do dana održavanja izbora naći će se na izvodu iz Centralnog biračkog spiska na redovnom biračkom mjestu u općini u kojoj je imao prebivalište do dana promjene prebivališta.

Nadležni organ koji vodi evidenciju o promjenama prebivališta i boravišta vrši provjeru tačnosti podataka o promjeni prebivališta i boravišta, o čemu se sačinjava službeni izvještaj."

Član 19.

U članu 3.13 u stavu (3) riječi: "tačke a), b), c), e) i f)" zamjenjuju se riječima: "tačke a), b), c), e) i j)".

Član 20.

U članu 3.15 na kraju stava (1) prije tačke dodaju se riječi: "te izjašnjenje o opciji glasanja: u DKP-u ili poštom."

U istom članu u stavu (2) na kraju prethodnjeg rečenice dodaju se riječi: "te sadržavati izjašnjenje o opciji glasanja: u DKP-u ili poštom."

U članu 3.15 stav (3) tačka c) riječ "prebivalištu" zamjenjuje se riječima: "promjeni prebivališta".

U istom članu iza stava (4) dodaje se novi stav (5), koji glasi:

"(5) Popunjenu i potpisanu prijavu i potrebne dokumente podnosilac prijave može poslati telefaksom i elektronskim putem. Postupak i način slanja, primanja, obrade, arhiviranja i zaštite elektronskih prijava i dokumenata utvrđuje Centralna izborna komisija BiH posebnim propisom."

Dosadašnji st. (5), (6) i (7) postaju st. (6), (7) i (8).

U istom članu iza stava (7) koji je ovim izmjenama postao stav (8) dodaje se novi stav (9), koji glasi:

"(9) Upis u Centralni birački spisak državljana Bosne i Hercegovine koji imaju status izbjeglih lica iz Bosne i Hercegovine, a koji imaju biračko pravo u skladu s ovim Zakonom, kontinuirani je proces koji se vrši tokom cijele godine, uz priloženu dokumentaciju iz stava (3) ovog člana."

POGLAVLJE 4. OVJERA I KANDIDOVANJE ZA IZBORE

Član 21.

U članu 4.3 u drugoj rečenici riječ "zahtjev" zamjenjuje se riječju "prijavu" i iza riječi "organa" dodaju se riječi: ", koji nije stariji od 60 dana".

U istom članu u trećoj rečenici riječ "zahtjev" zamjenjuje se riječju "prijavu".

Član 22.

U članu 4.4 u stavu (1) riječ "zahtjev" zamjenjuje se riječju "prijava" i iza riječi "potpis" dodaju se riječi: ", broj važeće lične karte".

U istom članu u stavu (4) iza riječi "prezime" dodaju se riječi: ", broj važeće lične karte".

U istom članu u stavu (5) u tački 3. iza riječi: "Republike Srpske" dodaju se riječi: ", ili za izbor predsjednika i potpredsjednika Republike Srpske".

U istom članu u stavu (5) u tački 5. riječi: "na posljednjim izborima održanim za taj nivo vlasti" zamjenjuju se riječima: "na dan raspisivanja izbora".

U istom članu u stavu (5) u tački 6. riječi: "na posljednjim izborima održanim za taj nivo vlasti" zamjenjuju se riječima: "na dan raspisivanja izbora".

Član 23.

U članu 4.5 u st. (1) i (2) riječ "zahtjev" zamjenjuje se riječju "prijavu".

Član 24.

U članu 4.7 riječ "suda" zamjenjuje se riječju "organa".

Član 25.

U članu 4.8 u stavu (1) u tački 6. riječi: "na posljednjim izborima održanim za taj nivo vlasti" zamjenjuju se riječima: "na dan raspisivanja izbora".

U istom članu i stavu u tački 3. iza riječi: "Republike Srpske" dodaju se riječi: ", ili za izbor predsjednika i potpredsjednika Republike Srpske".

Član 26.

Član 4.9 mijenja se i glasi:

"Član 4.9

Kada se nezavisni kandidat s mandatom u svojstvu nezavisnog kandidata kandidira za organ koji je na istom ili nižem nivou od organa u kojem ima mandat, oslobođen je obaveze prikupljanja potpisa iz člana 4.8 ovog Zakona, osim obaveze prikupljanja potpisa za izbor člana Predsjedništva Bosne i Hercegovine, predsjednika i potpredsjednika Republike Srpske."

Član 27.

U članu 4.10 u stavu (1) iza riječi "prezime" dodaju se riječi: "nacionalnost i broj važeće lične karte".

U istom članu stav (7) mijenja se i glasi:

"(7) Nakon ovjere nezavisni kandidat ne može povući kandidaturu."

Član 28.

U članu 4.12 u st. (1) i (2) riječ "zahtjev" zamjenjuje se riječju "prijavu".

Član 29.

U članu 4.13 u stavu (1) iza riječi "jedinici" dodaju se riječi: "za isti organ vlasti".

Član 30.

U članu 4.14 riječ "prvobitno" briše se i iza riječi "ovjerena" dodaju se riječi: "za prethodne izbore".

Član 31.

U članu 4.19 u stavu (3) riječi: "dva (2)" zamjenjuju se riječima: "najviše pet".

U istom članu u stavu (5) u drugoj rečenici iza riječi "kandidature" dodaju se riječi: ", izjava da nema smetnji iz člana 1.10 stav (1) tačka 4. ovog Zakona i izjava o imovinskom stanju kandidata iz člana 15.7 ovog Zakona".

U trećoj rečenici riječi: "mora biti ovjereno" zamjenjuju se riječima: "i izjave moraju biti ovjerene" i iza riječi "zakonom" dodaju se riječi: "ili kod nadležne općinske izborne komisije".

Član 32.

U članu 4.23 stav (3) mijenja se i glasi:

"(3) Centralna izborna komisija BiH uklonit će s kandidatske liste kandidata iz stava (2) ovog člana i naložiti političkoj stranci, koaliciji ili listi nezavisnih kandidata da u roku od 48 sati izvrši zamjenu kandidata na kandidatskoj listi i takav kandidat podliježe provjerama u skladu s odredbama ovog Zakona."

U istom članu iza stava (3) dodaje se novi stav (4), koji glasi:

"(4) Ako politička stranka, koalicija i lista nezavisnih kandidata ne izvrši zamjenu kandidata u roku iz stava (3) ovog člana, kandidatska lista bez imena kandidata iz stava (2) ovog člana smatrat će se potpunom i ovjerenom."

Član 33.

U članu 4.24 u stavu (3) iza riječi: "Službenom glasniku BiH" dodaju se riječi: "i sredstvima javnog informiranja".

U članu 4.24 dodaje se novi stav (3), koji glasi:

"(3) Kandidatska lista za kompenzacione mandate može sadržavati maksimalno onoliko imena kandidata koliko je političkoj stranci ili koaliciji već ovjereno na svim redovnim kandidatskim listama za sve višečlane izborne jedinice jednog entiteta i za isti izborni nivo."

Dosadašnji stav (3) postaje stav (4).

POGLAVLJE 5. PROVOĐENJE IZBORA

Član 34.

U članu 5.2 u stavu (1) iza riječi: "u pravilu", dodaju se riječi: "ima do 800, a".

Član 35.

U članu 5.18 u st. (1) i (2) iza riječi "nepotvrđenim" dodaje se riječ "-kovertiranim" u odgovarajućem padežu.

Član 36.

U članu 5.22 u stavu (3) riječi: "na osnovu javnog konkursa" brišu se.

Član 37.

U članu 5.26 u stavu (2) iza riječi "izlaže" dodaju se riječi: "detaljni tabelarni prikaz" i iza riječi "mjestu" dodaju se riječi: "po političkim subjektima i kandidatima".

Član 38.

U članu 5.27 u stavu (2) iza riječi "izložiti" dodaju se riječi: "detaljni tabelarni prikaz za" i iza riječi "izbora" dodaju se riječi: "po političkim subjektima i kandidatima".

Član 39.

Član 5.28 stav (1) mijenja se i glasi:

"Da bi bila prihvatljiva, svaka pojedinačna koverta s glasačkim listićem mora imati poštanski žig zemlje iz koje se glasa s datumom ne kasnijim od datuma održavanja izbora."

Član 40.

U članu 5.29 u stavu (1) riječ "potvrđuje" zamjenjuje se riječju "utvrđuje" i riječi: ", u roku od 30 dana od dana održavanja izbora" brišu se.

U istom članu stav (2) briše se.

Dosadašnji stav (3) postaje stav (2).

U istom članu u stavu (3) koji je ovim izmjenama postao stav (2) u prvoj rečenici iza riječi: "prikaz rezultata" dodaje se riječ "glasanja" i u drugoj rečenici iza riječi: "biračkog mjesta" dodaju se riječi: "po političkim subjektima i kandidatima".

Član 41.

Iza člana 5.29 dodaje se novi član 5.29a, koji glasi:

"Član 5.29a.

Centralna izborna komisija BiH objavljuje preliminarne, nezvanične i nekompletne rezultate izbora za sve nivoe vlasti za koje se izbori održavaju, po sljedećem rasporedu:

- a) prve rezultate u 00 sati prve nedjelje u oktobru,
- b) dva puta u toku naredna 24 sata,
- c) u narednih pet dana svaka 24 sata,
- d) narednih dana svakih 48 sati, sve do objavljivanja konačnih, službenih i kompletnih rezultata izbora."

Član 42.

U članu 5.30 u stavu (1) iza riječi: "Centralna izborna komisija BiH" dodaju se riječi: "utvrđi i" i iza riječi "nepotvrđene" dodaje se riječ "-kovertirane".

U istom članu u stavu (4) u tački 1. riječi: "većina članova općinske izborne komisije" zamjenjuju se riječima: "općinska izborna komisija".

U istom članu u stavu (5) riječi "samoinicijativno" zamjenjuju se riječima: "po službenoj dužnosti".

Član 43.

Član 5.32 mijenja se i glasi:

"Član 5.32

Nakon završetka ponovljenog brojanja glasačkih listića i istekom roka za podnošenje žalbe, odnosno nakon pravosnažnosti odluka, Centralna izborna komisija BiH potvrđuje izborne rezultate za organe na svakom pojedinom nivou vlasti, u roku od 30 dana od dana održavanja izbora.

Centralna izborna komisija BiH donosi propise o potvrđivanju izbornih rezultata."

POGLAVLJE 6. ZAŠTITA IZBORNOG PRAVA

Član 44.

U članu 6.2 u stavu (2) iza riječi "zaposlenog" dodaju se riječi: "ili na drugi način angažiranog".

Član 45.

U članu 6.3 u stavu (1) prva rečenica: "Prigovor se podnosi u pisanoj formi" mijenja se i glasi:

"Prigovor se podnosi na obrascu koji propiše Centralna izborna komisija BiH."

U istom članu na kraju stava (2) dodaje se nova rečenica koja glasi:

"Podaci o ovlaštenom predstavniku političke stranke deponiraju se kod općinske izborne komisije."

Član 46.

U članu 6.4 u stavu (1) riječi: "iz člana 7.3 stav 1. tačka 7." zamjenjuju se riječima: "7.3 stav (1) tačka 3. i 7., člana 7.3 stav (2)".

U istom članu u stavu (2) dodaje se nova rečenica koja glasi: "Prilikom rješavanja prigovora, općinska izborna komisija može postupati na osnovu utvrđenih činjenica ili održavati rasprave."

Član 47.

U članu 6.5 iza riječi: "Centralnog biračkog spiska" dodaju se riječi: "pokrenuti inicijativu za", iza riječi "ili" dodaju se riječi: "smijeniti člana" i iza riječi: "krši ovaj zakon" dodaju se riječi: "i izreći novčanu kaznu".

Član 48.

U članu 6.6 u stavu (1) riječi: "Poglavlje 16. i člana 6.4 ovog Zakona" zamjenjuju se riječima: "povrede Poglavlja 16. učinjene od političkog subjekta i povrede iz člana 7.3 stav (1) tačka 3. i 7, člana 7.3 stav (2) i člana 7.4 stav (1) tačka 3. ovog Zakona".

U istom članu u stavu (2) riječ "svih" briše se i iza riječi "BiH" dodaju se riječi: ", u roku od 48 sati od prijema prvostepene odluke".

U istom članu stav (4) mijenja se i glasi:

"Prigovor ili žalbu koje je prema članu 6.2 ovog Zakona podnijelo neovlašteno lice, ili ako prigovor ili žalba nisu blagovremeno podneseni, odbacuju se."

Član 49.

U članu 6.7 u stavu (1) u prvoj rečenici iza riječi "odlučuje" dodaju se riječi: "po službenoj dužnosti ili kada odlučuje".

Član 50.

U članu 6.9 u stavu (1) u drugoj rečenici iza riječi "BiH" dodaju se riječi: ", kojom je odlučeno o primjeni ovog Zakona".

U istom članu u stavu (3) iza riječi: "Suda Bosne i Hercegovine" dodaju se riječi: ", kada odlučuje o primjeni ovog Zakona."

POGLAVLJE 7. PRAVILA PONAŠANJA U IZBORNOJ KAMPANJI

Član 51.

U članu 7.1 na kraju stava (3) dodaju se riječi: "o čemu će podnosiocima obavijestiti nadležni organ, u roku ne dužem od 12 sati od podnesenog obavještenja o održavanju javnog skupa".

Član 52.

U članu 7.2 u stavu (3) riječi: "ili iznad njih, kao ni na saobraćajnim znacima" zamjenjuju se riječima: ", i javnim površinama, osim na mjestima predviđenim za plakatiranje i oglašavanje".

Član 53.

U članu 7.3 u stavu (1) iza riječi "zaposlenima" dodaju se riječi: "ili na drugi način angažiranim".

U istom članu u stavu (1) u tački 7. iza riječi "simbole" dodaju se riječi: ", audio i video zapise, SMS poruke, internet komunikacije".

POGLAVLJE 9. PARLAMENTARNA SKUPŠTINA BOSNE I HERCEGOVINE

Potpoglavlje A. Predstavnički dom Parlamentarne skupštine Bosne i Hercegovine

Član 54.

Iza člana 9.7 dodaje se novi član 9.7a, koji glasi:

"Član 9.7a.

Izuzetno od odredbi člana 9.6 i 4.24 ovog Zakona politička stranka i koalicija koja na kandidatskoj listi za kompenzacione mandate nema više kandidata, a ima još osvojenih mandata za raspodjelu, može po obavještenju Centralne izborne komisije BiH u roku od 48 sati, na propisanom obrascu, dostaviti dopunsku kandidatsku listu za kompenzacione mandate u skladu s članom 4.19 stav (4) ovog Zakona.

Postupak podnošenja dopunske kandidatske liste za kompenzacione mandate i formu obrasca iz stava (1) ovog člana Centralna izborna komisija BiH propisat će posebnim uputstvom."

Potpoglavlje B. Dom naroda Parlamentarne skupštine Bosne i Hercegovine

Član 55.

U članu 9.12c. u stavu (1) riječi: "svaka politička stranka" zamjenjuju se riječima: "svaki politički subjekat".

POGLAVLJE 13. KANTONALNE SKUPŠTINE, OPĆINSKA VIJEĆA, ODNOSNO SKUPŠTINE OPĆINA I GRADSKA VIJEĆA, ODNOSNO SKUPŠTINE GRADA

Član 56.

U članu 13.6 druga rečenica: "Ako mandat nezavisnog kandidata koji se nije kandidirao na listi nezavisnih kandidata prestane u skladu s članom 1.10 ovog Zakona, mandat ostaje upražnjen" briše se.

U istom članu dodaje se novi stav (2), koji glasi:

"(2) Centralna izborna komisija BiH vrši ponovnu raspodjelu mandata prema proceduri utvrđenoj u članu 9.5 ovog Zakona."

Član 57.

Član 13.7 mijenja se i glasi:

"(1) Općinski načelnik odnosno gradonačelnik bira se u skladu s ovim Zakonom, ustavima, entitetskim zakonima i statutom općine odnosno grada.

(2) Ako se općinski načelnik, odnosno gradonačelnik bira neposredno, općinskog načelnika, odnosno gradonačelnika biraju birači upisani u Centralni birački spisak u toj izbornoj jedinici u skladu s ovim Zakonom, entitetskim zakonom, statutom općine, odnosno grada.

(3) U slučaju da izabranom načelniku odnosno gradonačelniku iz stava (2) ovog člana prestane mandat u skladu s članom 1.10 ovog Zakona ili bude opozvan, općinski načelnik odnosno gradonačelnik bira se u skladu s ovim Zakonom, entitetskim zakonom, statutom općine odnosno grada."

Član 58.

U članu 13.10 u stavu (3) riječi: "članom 13.7 stavom 3. ovog Zakona" zamjenjuju se riječima: "zakonom i statutom".

Član 59.

U članu 13.11 iza riječi "općine," dodaju se riječi: "gradskog vijeća, skupštine grada,".

Član 60.

Član 13.12 mijenja se i glasi:

"U roku od 15 dana od dana konstituisanja općinskog vijeća, odnosno skupštine općine vrši se izbor članova gradskog vijeća, odnosno skupštine grada."

POGLAVLJE 13A. UČEŠĆE PRIPADNIKA NACIONALNIH MANJINA U IZBORIMA ZA OPĆINSKI NIVO

Član 61.

Član 13.14 mijenja se i glasi:

- "(1) Pripadnici nacionalnih manjina imaju pravo na zastupljenost u općinskom vijeću, odnosno u skupštini općine i gradskom vijeću, odnosno skupštini grada srazmjerno procentu njihovog učešća u stanovništvu prema posljednjem popisu u Bosni i Hercegovini.
- (2) Broj pripadnika nacionalnih manjina koji se neposredno biraju u općinsko vijeće, odnosno skupštinu općine i gradsko vijeće, odnosno skupštinu grada utvrđuje se statutom općine, odnosno grada, pri čemu se pripadnicima svih nacionalnih manjina koji u ukupnom broju stanovništva te izborne jedinice prema zadnjem popisu stanovništva učestvuju s više od 3% garantira najmanje jedno mjesto.
- (3) Da bi se ovjeralo za učešće na izborima za popunu garantiranih mandata za pripadnike nacionalnih manjina u općinskom vijeću, odnosno skupštini općine i gradskom vijeću, odnosno skupštini grada, političke stranke i nezavisni kandidati podnose prijavu za učešće na izborima za općinsko vijeće, odnosno skupštinu općine i gradsko vijeće, odnosno skupštinu grada, u skladu s odredbama ovog Zakona.
- (4) Pravo prijave za učešće na izborima za popunu garantiranih mandata za pripadnike nacionalnih manjina ima i:
- a) registrirano udruženje ili drugi registrirani organizirani oblik djelovanja nacionalnih manjina i
 - b) grupa od najmanje 40 građana koji imaju biračko pravo koji uz prijavu za učešće na izborima dostavljaju i imena kandidata.
- (5) Kandidati koje predloži udruženje odnosno drugi registrirani organizirani oblik djelovanja nacionalnih manjina i grupa od najmanje 40 građana koji imaju biračko pravo imaju status nezavisnog kandidata.
- (6) Političke stranke, koalicije političkih stranaka, udruženja nacionalnih manjina i drugi registrirani organizirani oblici nacionalnih manjina, te grupa od najmanje 40 građana koji imaju biračko pravo mogu predložiti najviše onoliko kandidata koliko se pripadnika nacionalnih manjina bira u toj izbornoj jedinici.
- (7) Nakon što se ovjeri kandidatura svakog pojedinačnog kandidata, Centralna izborna komisija BiH utvrđuje konačnu posebnu listu kandidata pripadnika nacionalnih manjina za općinsko vijeće odnosno u skupštinu općine i gradsko vijeće, odnosno skupštinu grada.
- (8) Kao predstavnik nacionalne manjine može biti izabran samo onaj kandidat čije ime se nalazi na posebnoj listi kandidata pripadnika nacionalnih manjina predloženih u skladu s odredbama ovog člana.
- (9) Posebna lista kandidata pripadnika nacionalnih manjina iz stava (7) ovog člana nalazi se na glasačkom listiću iza listi ostalih političkih subjekata čije se kandidatske liste takmiče za redovne mandate za općinsko vijeće, odnosno skupštinu općine i gradsko vijeće, odnosno skupštinu grada.
- (10) Redoslijed kandidata na posebnoj listi iz stava (9) ovog člana utvrdit će se žrebanjem na način i po postupku koji utvrdi Centralna izborna komisija BiH.
- (11) Birač ima samo jedan glas. Ako se birač opredijeli da glasa za posebnu listu kandidata pripadnika nacionalnih manjina, glasat će tako što će označiti ime samo jednog kandidata na posebnoj listi kandidata pripadnika nacionalnih manjina.
- (12) Za predstavnika pripadnika nacionalne manjine bit će izabran kandidat koji dobije najveći broj glasova na posebnoj listi kandidata pripadnika nacionalnih manjina. U općinskom vijeću, odnosno u skupštini općine i gradskom vijeću, odnosno skupštini grada u kojima se dodjeljuje više od jednog mandata, mandati će se dodijeliti kandidatima sa sljedećim najvećim brojem osvojenih glasova prema broju osvojenih važećih glasova.
- (13) Odredbe člana 9.5 stav (3) ovog Zakona neće se primijeniti prilikom raspodjele mandata za liste pripadnika nacionalnih manjina za općinsko vijeće, odnosno skupštinu općine i gradsko vijeće, odnosno skupštinu grada.

(14) Pri raspodjeli mandata, prvo se dodjeljuju garantirani mandati pripadnicima nacionalnih manjina, a zatim redovni mandati u skladu s članom 9.5 ovog Zakona.

(15) U slučaju da dva kandidata na posebnoj listi kandidata pripadnika nacionalnih manjina dobiju isti broj važećih glasova, mandat će se dodijeliti žrijebanjem koje organizira Centralna izborna komisija BiH.

(16) Ako se ne dodijeli pripadniku nacionalne manjine, mandat ostaje upražnjen.

(17) U slučaju prestanka mandata izabranog nosioca mandata iz stava (12) ovog člana u smislu odredbi člana 1.10 ovog Zakona, zamjenski mandat dodijelit će se kandidatu sa sljedećim najvećim brojem dobivenih važećih glasova na posebnoj listi kandidata pripadnika nacionalnih manjina. Ako je lista iscrpljena, mandat ostaje upražnjen.

(18) Za sve što nije regulirano ovim poglavljem, primjenjivat će se opće odredbe ovog Zakona."

POGLAVLJE 14. PONOVLJENI, ODGOĐENI I PRIJEVREMENI IZBORI

Član 62.

U članu 14.1 riječ "vrše" zamjenjuje se riječju "provode".

Član 63.

U članu 14.2 dodaje se novi stav (1), koji glasi:

"(1) Odluku o odgađanju izbora na određenom biračkom mjestu ili u izornoj jedinici donosi Centralna izborna komisija BiH na osnovu činjenica koje ukazuju da izbore nije moguće provesti u skladu sa odredbama ovog Zakona."

Dosadašnji st. (1), (2) i (3) postaju st. (2), (3) i (4).

U istom članu u stavu (1), koji je ovim izmjenama postao stav (2), riječ "vrše" zamjenjuje se riječju "provode".

POGLAVLJE 15. FINANSIRANJE KAMPANJE

Član 64.

U članu 15.1 u stavu (1) u tački 2. riječ "doprinosima" zamjenjuje se riječju "prilozima" u odgovarajućem padežu i iza riječi: "preduzetničke aktivnosti" dodaju se riječi: "u skladu s odredbama Zakona o finansiranju političkih stranaka".

U istom članu u stavu (1) u tački 2. riječ "doprinosa" zamjenjuje se riječju "priloga".

U istom članu dodaju se novi st. (2) i (3), koji glase:

"(2) Prijava za učešće na izborima političke stranke i nezavisnog kandidata neće biti ovjerena ukoliko politička stranka i nezavisni kandidat ne podnesu finansijski izvještaj za period koji počinje tri mjeseca prije početka perioda za podnošenje prijave za ovjeru.

(3) Centralna izborna komisija BiH neće izdavati uvjerenje licima koja su dobila mandat na svim nivoima neposrednih i posrednih izbora u Bosni i Hercegovini obuhvaćenih ovim Zakonom, ukoliko njihova politička stranka i nezavisni kandidat ne podnesu Centralnoj izornoj komisiji BiH finansijski izvještaj za period od dana podnošenja prijave za ovjeru za izbore do dana ovjere rezultata izbora u roku od 30 dana od dana objavljivanja izbornih rezultata u "Službenom glasniku BiH"."

Član 65.

U članu 15.7 u stavu (1) u tački 1. riječ "doprinose" zamjenjuje se riječju "priloge" i riječi: "u proteklih 12 mjeseci" zamjenjuju se riječima: "u protekloj kalendarskoj godini".

Član 66.

U članu 15.8 u stavu (2) riječi: "60 dana prije" zamjenjuju se riječima: "30 dana nakon".

Član 67.

U članu 15.10 u st. (1) i (2) riječ "glasača" zamjenjuje se riječju "birača".

POGLAVLJE 16. MEDIJI U IZBORNOJ KAMPANJI

Član 68.

U članu 16.9 u stavu (1) riječ "Elektronski" zamjenjuje se riječima: "Javni elektronski" i iza riječi "objavljivati" dodaju se riječi: "radio i TV spot,".

U istom članu dodaje se stav (2), koji glasi:

"(2) Ukoliko javni elektronski medij odbije da postupi u skladu sa stavom (1) ovog člana, Centralna izborna komisija BiH podnijet će prijavu Regulatornoj agenciji za komunikacije na nadležni postupak."

Član 69.

U članu 16.14 dodaje se novi stav (3), koji glasi:

"(3) Zabranjeno je vođenje plaćene izborne kampanje putem elektronskih i printanih medija, ili bilo kojeg oblika plaćenog javnog oglašavanja, osim održavanja internih skupova organa i statutarnih tijela političkih subjekata, u periodu od dana raspisivanja izbora do dana službenog početka izborne kampanje."

Dosadašnji st. (3) i (4) postaju st. (4) i (5).

Član 70.

U članu 16.16 stav (2) mijenja se i glasi:

"(2) Za rješavanje po prigovorima na povrede ovog poglavlja od političkih subjekata nadležna je Centralna izborna komisija BiH."

POGLAVLJE 17. IZBORNI POSMATRAČI

Član 71.

U članu 17.4 u stavu (1) tačka 2. mijenja se i glasi:

"2. ime, broj važeće lične karte i jedinstveni matični broj predloženog posmatrača."

U istom članu dodaje se stav (2), koji glasi:

"(2) U slučaju kada Centralna izborna komisija BiH utvrdi da je udruženje građana osnovano i da ga sponzorira ovjerena politička stranka, odnosno da je uključeno u bilo kakve aktivnosti u ime ovjerene političke stranke, Centralna izborna komisija BiH odbit će izdavanje akreditacije takvom udruženju."

Član 72.

U članu 17.5 u stavu (5) iza riječi "imena" dodaju se riječi: ",broj važeće lične karte".

Član 73.

U članu 17.10 u stavu (2) riječ "člana" zamjenjuje se s riječju "Poglavlja".

Član 74.

Iza POGLAVLJA 19. GRAD MOSTAR dodaje se novo POGLAVLJE 19A. KAZNENE ODREDBE, koje glasi:

"POGLAVLJE 19A. KAZNENE ODREDBE

Član 19.8

Novčanom kaznom u iznosu od 200,00 KM do 1.000,00 KM kaznit će se zaposleni ili angažirani u izbornoj administraciji za povredu ako:

- a) učestvuje u donošenju odluke koja može dovesti u sumnju njegovu sposobnost da djeluje nepristrasno (član 2.1);
- b) ne odredi biračka mjesta na području općine za glasanje na svim nivoima vlasti u Bosni i Hercegovini (član 2.13 stav (1) tačka 3);
- c) ne osigura izborni materijal za glasanje na svim nivoima izbora u Bosni i Hercegovini (član 2.13 stav (1) tačka 5));
- d) ne obavijesti birače o svim informacijama neophodnim za provođenje izbora, u skladu s propisima Centralne izborne komisije BiH (član 2.13 stav (1) tačka 6);
- e) nepravilno broji glasačke listiće na biračkim mjestima i u općinskim centrima za brojanje (član 2.13 stav (1) tačka 8);
- f) imenuje predsjednika i članove biračkih odbora i njihove zamjenike suprotno članu 2.19 stav (3);
- g) ne ažurira podatke u skladu s promjenom broja birača i propisima Centralne izborne komisije BiH (član 3.8 stav (3) tačka b));
- h) ne osigura uvid u izvod iz Centralnog biračkog spiska na teritoriji svoje općine (član 3.8 stav (3) tačka c));
- i) ne osigura podatke za Centralni birački spisak koji su utvrđeni propisima Centralne izborne komisije BiH (član 3.8 stav (3) tačka d));
- j) ne vodi evidenciju zahtjeva i prigovora i ne čuva dokumentaciju (član 3.8 stav (4));
- k) odredi biračka mjesta suprotno članu 5.1 stav (3);
- l) ne osigura izborni materijal za glasanje (član 5.3 stav (3));
- m) zapisnik o radu biračkog odbora ne sadrži podatke propisane ovim Zakonom (član 5.7);
- n) ne objasni biraču način glasanja i ne osigura tajnost glasanja (član 5.11 stav (1));
- o) ne utvrdi identitet birača i potpis birača na izvodu iz Centralnog biračkog spiska u skladu s ovim Zakonom (član 5.13);
- p) pomaže licu pri glasanju na način koji nije u skladu s ovim Zakonom (član 5.19 stav (2));
- r) su obrasci popunjeni suprotno članu 5.25 i
- s) podaci objedinjenih zbirnih rezultata glasanja za općinu nisu u skladu s članom 5.27.

Član 19.9

(1) Novčanom kaznom u iznosu od 1.000,00 KM do 10.000,00 KM kaznit će se politički subjekt za povredu ako:

- a) u roku od deset dana ne dostavi izmjene podataka (član 4.22);
- b) uklanja, prekriva, oštećuje ili mijenja štampane oglase, plakate, postere ili druge materijale koji se, u skladu sa zakonom, koriste u svrhu izborne kampanje političkih stranaka, koalicija, listi nezavisnih kandidata ili nezavisnih kandidata (član 7.2 stav (2));
- c) postavlja oglase, plakate, postere, odnosno piše svoje ime ili slogane koji su u vezi s izbornom kampanjom, u ili na zgradama u kojima su smješteni organi državne vlasti, na javnim površinama, na javnim putevima, duž njih ili iznad njih, kao i na saobraćajnim znacima (član 7.2 stav (3));
- d) nosi i pokazuje oružje na političkim skupovima, biračkim mjestima i njihovoj okolini, kao i za vrijeme okupljanja u vezi sa aktivnostima političkih stranaka, koalicija, listi nezavisnih kandidata i nezavisnih kandidata u izbornom procesu (član 7.3 stav (1) tačka 1);

- e) ometa skupove drugih političkih stranaka, koalicija i nezavisnih kandidata, kao i podstiče druge na takve aktivnosti (član 7.3 stav (1) tačka 2));
- f) sprečava novinare da obavljaju svoj posao u skladu s pravilima profesije i izbornim pravilima (član 7.3 stav (1) tačka 3);
- g) obećava novčane nagrade s ciljem dobivanja podrške birača ili prijeti pristalicama drugih političkih stranaka, koalicija, listi nezavisnih kandidata i nezavisnih kandidata (član 7.3 stav (1) tačka 4);
- h) podstiče na glasanje lice koje nema pravo glasa (član 7.3 stav (1) tačka 5);
- i) podstiče lica da glasaju više puta na istim izborima, ili da glasaju u ime drugog lica (član 7.3 stav (1) tačka 6);
- j) koristi se jezikom koji bi nekoga mogao navesti ili podstaći na nasilje ili širenje mržnje, ili objavljuje ili upotrebljava slike, simbole, audio i video zapise, SMS poruke, internet poruke ili druge materijale koji mogu tako djelovati (član 7.3 stav (1) tačka 7));
- k) se lažno predstavlja u ime bilo koje političke stranke, koalicije, liste nezavisnih kandidata ili nezavisnog kandidata (član 7.3 stav (2));
- l) održava skupove s ciljem izborne kampanje (član 7.4 stav (1) tačka 1);
- m) izlaže na biračkom mjestu i u njegovoj okolini bilo kakve materijale s ciljem uticaja na birače (član 7.4 stav (1) tačka 2));
- n) koristi domaća i međunarodna sredstava komunikacije s ciljem uticaja na birače (član 7.4 stav (1) tačka 3));
- o) koristi megafon ili druge razglasne uređaje s ciljem uticaja na birače (član 7.4 stav (1) tačka 4);
- p) ometa ili opstruira izborni proces (član 7.4 stav (1) tačka 5);
- r) ne podnese uz izjavu o prihvatanju kandidature za izbore i izjavu o ukupnom imovinskom stanju na određenom obrascu (član 15.7);
- s) vodi izbornu kampanju u periodu od dana raspisivanja izbora do dana službenog početka izborne kampanje (član 16.14 stav (3));
- t) posmatrač, u toku posmatranja izbornog procesa, ometa izborne aktivnosti, ne poštuje tajnost glasanja (član 17.2 stav (2));
- u) posmatrač za vrijeme posmatranja izbornih aktivnosti ne nosi službenu akreditaciju i nosi bilo kakva obilježja ili oznake koje ih povezuju s određenom političkom strankom, koalicijom, listom nezavisnih kandidata ili nezavisnim kandidatom (član 17.2 stav (2));

(2) Za povrede iz stava (1) tačka b), c), d), e), f), g), h), i), j), k), l), m), n), o) i p) ovog člana koji počini pristalica političkog subjekta kaznit će se taj politički subjekt.

(3) Za povrede iz stava (1) tačka a) ovog člana kaznit će se i odgovorno lice političke stranke, koalicije i liste nezavisnih kandidata novčanom kaznom u iznosu od 200,00 KM do 5.000,00 KM.

(4) Za povrede iz stava (1) tačka b), c), d), e), f), g), h), i), j), k), l), m), n), o), p) i r) ovog člana kaznit će se i kandidat političkog subjekta novčanom kaznom u iznosu od 1.000,00 KM do 5.000,00 KM.

(5) Za povrede iz stava (1) tačka d), h), i) ovog člana kaznit će se i zaposleni ili angažirani u izornoj administraciji novčanom kaznom u iznosu od 200,00 KM do 1.000,00 KM.

Član 19.10

Novčanom kaznom u iznosu od 200,00 KM do 3.000,00 KM kaznit će se za povrede kandidat izabran na svim nivoima vlasti ako:

- a) u roku od 30 dana od dana objave ovjere mandata u "Službenom glasniku BiH", na posebnom obrascu, ne preda potpisanu izjavu o imovinskom stanju iz člana 15.7 ovog Zakona (član 15.8 stav (1)) i

b) u roku od 30 dana nakon isteka mandata na koji je izabran, kao i u slučaju prestanka mandata u smislu člana 1.10 stav (1) tačke 1., 3., 5., 6. i 7. ovog Zakona u roku od 30 dana od dana prestanka mandata, ne podnese izvještaj o imovinskom stanju (član 15.8 stav (2)).

POGLAVLJE 20. PRIJELAZNE I ZAVRŠNE ODREDBE

Član 75.

Član 20.12 briše se.

Član 76.

Iza člana 20.12 dodaje se novi član 20.12a, koji glasi:

"Član 20.12a.

Glasanje u diplomatsko-konzularnom predstavništvu BiH iz člana 1.5 stav (2) ovog Zakona održat će se samo u onom diplomatsko-konzularnom predstavništvu BiH za koje Centralna izborna komisija BiH, u saradnji s Ministarstvom vanjskih poslova BiH, utvrdi da ispunjava uvjete propisane posebnim propisom iz člana 1.5 stav (3)."

Iza člana 20.12a. dodaje se novi član 20.12b. koji glasi:

"Član 20.12b.

(1) Izuzetno, od odredbi člana 9.10 i člana 4.24 ovog Zakona, političkom subjektu, koji je na neposrednim izborima održanim 1. oktobra 2006. godine, dobio kompenzacijski mandat, koji je ostao upražnjen, dodjeljuje se mandat kandidatu s najvećim brojem dobivenih glasova s redovne kandidatske liste istog izbornog nivoa tog političkog subjekta.

(2) Centralna izborna komisija BiH će posebnim propisom utvrditi način primjene ovog člana."

Član 77.

Ovaj Zakon stupa na snagu narednog dana od dana objavljivanja u "Službenom glasniku BiH".

PSBiH broj 181/08
16. aprila 2008. godine
Sarajevo

Predsjedavajući
Predstavničkog doma
Parlamentarne skupštine BiH
dr. **Milorad Živković**, s. r.

Prvi zamjenik predsjedavajućeg
Doma naroda
Parlamentarne skupštine BiH
dr. **Mladen Ivanić**, s. r.